

**Uunga siunnersuut: Atuarfik pillugu Inatsisartut inatsisaata allanngortinneqarnera pillugu  
Inatsisartut inatsisaat nr. xx ulloq xx. xxx 2017-imeersoq  
pillugu**

**Kultureqarnermut, Ilinniartitaanermut, Iisimatusarnermut Ilageeqarnermullu  
Ataatsimiititaliap**

**Siunnersuutip aappassaanneerreqarnerani saqqummiunneqarneranut**

**ISUMALIUTISSIISUTAA**

Kultureqarnermut, Ilinniartitaanermut, Iisimatusarnermut Ilageeqarnermullu  
Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqtigiit, Siulittaasoq

Inatsisartunut ilaasortaq Vivian Motzfeldt, Siumut, Siulittaasup tullia

Inatsisartunut ilaasortaq Laura Táunâjik, Siumut

Inatsisartunut ilaasortaq Peter Olsen, Inuit Ataqtigiit

Inatsisartunut ilaasortaq Anthon Frederiksen, Partii Naleraq

UKA2017-mi ulloq 29. september 2017 siunnersuutip siullermeerneqarnerata kingorna  
siunnersuut ataatsimiititaliamit suliarineqarpoq.

**1. Siunnersuutip imarisaa siunertaalu**

Atuarfik pillugu inatsisip atuuttup allanngortinneqarnissaanut allannguutissatut  
siunnersuutini arlalinnik siunnersuut una imaqarpoq. Aalajangersimasumik allannguutissatut  
siunnersuutigineqarpoq atuartitsissutigineqartartup pingaartinneqangippallaarnera  
pissutigalugu oqaluttuarisaanermik atuartitsinerup nukittorsarneqarnissaanik. Tamatuma  
saniatigut atuartitsissutigineqartartup summiffiimmi qinigassat arlalinnigorlugu qinigassanut  
assigiinngitsunut immikkoortinneratigut allanngortinneqarnissaa siunnersuutigineqarpoq-  
tamanna atuartitsissutit assasornermut nipilesornermullu tunngasut nukittorsarniarlugit.  
Ilanngullugu Naalakkersuisunit siunnersuutigineqarpoq meeqqap ineriartorneranut  
iluaqutaasinnaappat atuartut klassimik alluisinnaanerannut kiisalu klassimik  
ingerlateriikkamminnik uteqqinneqarsinnaaneranut periarfissat pillugit ersarinnerusumik  
malittariassiortoqarnissaa.

Atuartut, atuartut angerlarsimaffianiitinneqartarnerat aamma kolligiemiitinneqartarnerat pillugu siunnersuutigineqarpoq minnerpaaffiliisumik piumasaqaat pillugu malittarisassiortoqarnissaanik. Kingullertullu Naalakkersuisunit siunnersuutigineqarpoq, suniutit uuttorneqartarnerannut aalajangersakkap atuuttup allanngortinneqassasoq, taamaalilluni siunissami ilisimasanik katersuineq sunniutinik uuttuinnermik nalilernermillu tunngavilerneqartarniassammata, tamanna katersuinerup taamaallaat atuarfimmum tunngassutilinnik killilerneqarnerata saniatigut.

## **2. Tusarniaanermut akissuteqaatit**

Tusarniaanermut akissuteqaatit inatsisissatut siunnersuummut ilanngunneqarsimapput, tamannalu Inatsisartut siulittaasoqarfiani piumasarineqartunut naapertuuppoq.

Naalakkersuisut inatsisitigut pisussaaffitsik malillugu tusarniaanermi akissuteqaatinut oqaaseqaatit tamaasa oqaaseqarfigisimagaat ataatsimiititaliamit maluginiarneqarpoq. Suliaq tamanna ataatsimiititaliamit nersualaarumaneqarpoq. Taamaattorli ataatsimiititaliap isumaa malillugu tusarniaaffigineqartut siunnersuutaannut, oqaaseqaataannut apeqqutaannullu Naalakkersuisut akissuteqarnermi annertunerusumik pingaartitsinerusariaqarsimagaluarput. Assersuutigalugu ataatsimiititaliamit maluginiarneqarpoq pisut ilaanni tusarniaaffigineqartup pingaartitaa inatsisissatut siunnersuummut atuumassuteqanngitsutut Naalakkersuisunit nalileneqartarsimasut. Taamaattoqartillugu Naalakkersuisunit kaammattuutigineqassaaq sammisap pineqartup ilanngunneqarnera imaluunniit ilanngunneqannginnera iluaqutaassanersoq isummerfigeqqullugu.

## **3. Aallartitat**

Ilinniartitsisut Meeqqat Atuarfianneersut Kattuffianit aallartitat (IMAK) ataatsimiititaliamut sassartinneqarsimapput. Siunnersuummut pineqartumut tusarniaanermi akissutimi itisilerneqarnissaat kattuffimmit kissaatigineqarsimavoq.

## **4. Ataatsimiititaliap siunnersuummik suliarinninnera.**

Atuarfeqarnermi tunngaviatigut aalajangiisoqartariaqarnera ataatsimiititaliamit isumaqatigineqarpoq. Ataatsimiititaliamilli soqutigisaqatigiinnut tamanut eqqaasitsissutigineqassaaq atuarfeqarfimmi inuit – tassa meeqqat, sulisut angajoqqaallu pineqartarmata, tassa atortulersuutaannaanngitsut aaqqiissutissaq nutaaq misliutiginiarneqartillugu imaaliallaanaq allanngortinneqarsinnaasut. Atuarfimmik allannguinnermi piffissaq pisariaqartinneqartoq atorneqartariaqarpoq – aammalu allannguutissat sapinngisamik amerlanerussuteqartunik tapersorneqartariaqarlutik. Taamaalillugu tamatta atuarfiuterput eqqartorparput taamaattumillu siunertat, tunuliaquttat, anguniakkat sakkullu pillugit assigiimmik paasinnittoqartariaqarpoq.

#### **4.1 Atuartitsissutigineqartut imarisaasail.il. allanngortinneqarnerat**

2017 marsimi oqaatsit pillugit immikkut ilisimasalinnik pilersitsineq aallartitsinerlu pillugit Naalakkersuisoq tusagassiuutitigut nalunaaruteqarpoq. Immikkut ilisimasallit suliaasa siunertaat ima allassimallutik:

*”Meeqqat atuarfianni meeqqanilu suli atualinngitsuni oqaatsinik maannakkut atuartitsisarnermik immikkut ilisimasallit qulaajaassapput, allaaserinnissapput misissueqqissaarlutillu”<sup>1</sup>*

Atuarfimmi fagit pillugu apeqqummut tunngatillugit inatsisartut UPA2017/41-kkut imaattumik akuersissuteqarput:

*Meeqqat atuarfianni fagini tamani akunnernut ilinniartitsiviusussanut minnerpaaffiliinissaq anguniarlugu inatsimmut atuuttumut allannguutissatut siunnersuuteqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. **August 2020-mi allannguutissatut siunnersuut atuutilissaaq.** Tamatumunnga atatillugu Naalakkersuisut peqquneqarput akullerni atuartut tuluttut danskisullu atuartinneqartarnerisa amerlaqatigiissinnissaannik apeqqut atuarfimmi oqaatsinik piginnaasaqalernissaq pillugu immikkut ilisimasallit pilersinneqarsimasut suliassaannut ilanngunneqassasoq.*

(Ataatsimiititaliamit ersarissaaneq)

Taamatuttaaq ukiumi uani ilinniartitaanermut immikkoortup nutarterneqarnissaa siunertarineqartoq Naalakkersuisut tamanut saqqummiuttarpaat, tamatumani atuarfik aamma pineqarluni. Assersuutigalugu 16. august 2017 Naalakkersuisut tusagassiuutitut nalunaarutaanni takuneqarsinnaavoq ilinniartitaaneq pillugu nutarterinermi suliat aasami 2019-mi piareernissaat naatsorsuutigineqartoq<sup>2</sup>.

Inatsisissatut siunnersuummut matumunnga nassuiaatini nalinginnaasuni tusarniaanermut akissuteqaammut nr. 7.4-mut oqaaseqaat imaattoq takuneqarsinnaavoq:

*”Tamatumunnga atatillugu oqaatigineqassaaq Naalakkersuisut Inatsisartut ullormut oqaluuserisassamik UPA 2017/46-mik suliaqarneranni pisussaaffilerneqarmata inatsisissatut siunnersuummut allannguutissatut siunnersuuteqarnissamut, taamalu nalunaaquttap akunneri atuartitsiviusussat minnerpaaffissaanut piumasaqaatinik atuartitsissutissani tamani*

<sup>1</sup> <http://naalakkersuisut.gl/kl-GL/Naalakkersuisut/Pisut/2017/03/090317-EkspertgruppeSprog>

<sup>2</sup> [http://naalakkersuisut.gl/kl-GL/Naalakkersuisut/Pisut/2017/08/160817\\_uddannelsesreform](http://naalakkersuisut.gl/kl-GL/Naalakkersuisut/Pisut/2017/08/160817_uddannelsesreform)

*eqqussisoqassalluni. Tamanna naammassineqarniarpoq  
aaqqissuusseqqinnissami aggersumi.”<sup>3</sup>*

(Ataatsimiititaliamit ersarissaaneq)

Siunnersuutip immikkoortuini 1-9-ni atuarfimmi faginut allannguutissanik arlalinnik Naalackersuisut siunnersuuteqarput. Tamatuma nassatarisaanik atuarfeqarnermi malitsitut arlalinnik allannguisoqarpoq. Allannguutit taaneqartut siunnersuummi § 2, imm. 2, malillugu 1. august 2020-mi atuutilissapput.

Naalackersuisut taamatut allannguutissatut siunnersuuteqarnissaq qinersimammasuk ataatsimiititaliamit eqqumiiginartutut isigineqarpoq. Nutarterinissamik pisussaq eqqarsaatigalugu siunnersuutip immikkoortui 1-9 pingaaruteqarpallaangitsutut isigineqarsinnaapput. Suleqatigiissitat aamma oqaatsit pillugit immikkut ilisimasallit suliaasa ingerlanneqarnerisa nalaani Inatsisunik allannguinerit minnerusut arlallit akuersissutigineqarnissaannik atuutilersinneqarnissaannillu siunnersuut manna siunertaqarpoq. Ilanngullugulu siunertamut pitsaasuusorinangilaq, ataatsimiinnermi matumani inatsisissatut allannguutissaq suleqatigiissitat innersuussinerat takkuppet allanngortinneqartussaq Inatsisartut akuersissutigissappassuk. Atuarfimmi faginik arlalinnik allannguinissaq, inatsit manna suli atuutilinngitsoq Kommunit, Ilinniartitsisut, atuartut angajoqqaallu suli atulinnginneranni allanngorteqqinneqarnissaat ilimanaatilinnik allannguutitut piareersaateqarnissartik soqutigisarinnikkaat naatsorsuutigineqarsinnaavoq. Peqatigitillugu ataatsimiititaliap Naalackersuisunut sakkortuumik kaammattuutigaa suliaassat imm. 1-9-mi taaneqartut iluarsaaqqinnissami aggersumi ilannguteqqullugit.

Qulaani oqaatigineqartut tunngavigalugit Inatsisissatut siunnersuummi immikkoortut 1-9 peerneqarnissaat kiisalu nutarterinerup aallartinneqareersimasup utaqqineqarnissaa ataatsimiititaliamit pissusissamisoortutut isigineqarpoq.

Maannakkut unammilligassat atuarfimmuut tunngasut piumassuseqarfigineqannginnerattut inerniliineq manna isigineqassanngitsoq ataatsimiititamit erseqqissaatigineqassaaq. Kisiannili inatsisissatut siunnersuummi imarisat qulaani taaneqartut nutarterinermut sulianut ilanngunneqarsinnaapput ilanngunneqartariaqarlutillu, tamanna pingaartumik allannguutit ilaasa, ilinniartitaanermi nutarterineq pillugu inatsisartussat nutaat isummertinnagit atuutilernissaat isumaanngippat.

Siunnersuummi imm. 10-p ataani atuartut klassimik ataatsimik alluisinnaanerannut imaluunniit klassimik ataatsimik uteqqiisinnaanerannut periarfissaq pillugu erseqqissaateqarnissaq Naalackersuisunit siunnersuutigineqarpoq. Taamatut siunnersuuteqarnermut tunuliaqutigineqartoq ataatsimiititaliamit paasineqarpoq

<sup>3</sup> Eqqartorneqartoq tassaasoq UPA2017/41 ataatsimiititaliamit ilimagineqarpoq, taanna atuarfimmi tiimit atuarfiusut minnerpaaffilerneqarnissaannut attuumassuteqanngilaq.

soqutiginarlutullu isigineqarluni. Peqatigitillugu ataatsimiititaliaq isumaqarpoq atuartut ataasiakkaat aallaavigineqarnissaannut tamanna periarfissatsialaasoq.

Qulaani pineqartut tunngavigalugit inatsisissatut siunnersuummi imm. 10-p, taamatut isikkoqartillugu akuersissutigineqassasoq ataatsimiititaliaq isumaqarpoq.

#### **4.2 Ilisimasani katersuinermit allannguutit**

Tamatta atuarfiuterput pillugu ilisimasani katersineq ilisimasani piviusunik misilittakkanillu pitsaasunik tunngaveqarluni ineriartornermut pitsaasumut pingaaruteqarpoq. Atuarfimi unammilligassat, taamaalillunilu inuiaqatigiinni unammilligassat inuiaqatigiinnit pingaaruteqarlunnartut suliaasaapput, innuttaasunut, soqutigisaqatigiinnut naalackersuinermillu suliaqartunut attuumassuteqartut.

Immikkut ittumik ilitsersuisarneq pillugu siunnersuutip UPA2016/41-ip ataatsimiititaliamit suliarineqarneranut atatillugu Meeqqat atuarfiat pillugu inatsisit nr. 13. 3. november 2012-meersuni § 36, imm. 3 tunngavigalugu Naalackersuisut qanoq akulikitsigisumik pitsaassutsumik uuttortaasarnersut immikkut ataatsimiititaliamit misissorneqarpoq. UKA2016/41-mut isumaliutissiisummi ataatsimiititaliaq ima allassimavoq:

*”Naalackersuisut inatsisit tunngavigalugit suliaassatik nalunnikkaluarlugit suliarisannгимmatigit ataatsimiititaliamit naammagineqanngilaq isorilluinnarneqarlunilu. Siunnersuisarnerit pillugit uuttuisarnermik Naalackersuisut suliaqarsimanninnerannik Naalackersuisut akissuteqarnerat aatsaat upernaakkut ataatsimiinnermi matumani ataatsimiititaliap apeqquteqarneratigut pilersimannigitsutut ataatsimiititaliamit paasineqarpoq. Akissuteqaammi takuneqarsinnaavoq inatsisit atuutsinneqarsimanninnerat piffissami sivisunerusumi ingerlanneqarsimasoq. Paasissutissat taakku tunngavigalugit Naalackersuisut pissutsinik taamatut 2017-mi ukiaanerata tungaanut ingerlatsiniarnerat ataatsimiititaliap isornartorsiutaanik sakkortunerulersitsiinnarpoq. Qulaani taaneqartut sunniutinik uuttuinissamat piunasaqaatit naammassineqarnissaannut Naalackersuisut nukissanik amigaateqarsimagunik, tamanna ataatsimiititaliamut nalunaarutigisimannгimmassuk ataatsimiititaliamit ilanngullugu eqqumiigineqarpoq. Naalackersuisut tamatumunnga iluarsiniarnerminni, Naalackersuisunit pingaartitsinertut isigineqarsinnaasumut meeqqat atuarfiisa ataavartumik nalilersorneqarnissaannut taarsiullugu sunniutinik uuttuisarnerup Naalackersuisunit peerneqarnissaa siunertarineqarmat ataatsimiititaliamit pissusissamisunnigitsutut isigineqarpoq.”*

Isornartorsiuneq tamanna pitsaasutut tigullugu Naalackersuisut atuarfik pillugu inatsisimmi atuuttumi § 36, imm. 3-mut allannguutissatut siunnersuuteqarsimanerat ataatsimiititaliamit pitsaasutut isigineqarpoq. Taamaalillugu siunnersuummi matumani imm. 14-mi

Naalakkersuisut toqqaannartumik atuarfimmumt sammitinneqarsinaasunik nalilersuisarnermik aamma pitsaassutsip uuttortarneqartarneranut eqqaannerulersitsinissamik siunnersuuteqarput. Naalakkersuisut tamatuma saniatigut sunniutit pillugit uuttortaasarnermut aalajangersagaq atuuttup nassatarisaanik suleriaatsikkut ajornartorsiutit sunaassusersivaat. Naalakkersuisut taama iliorlutik pissutsinut piviusunut inatsisip atuuffissaanut atuarfimmik naleqqussaaniarsimanagerat ataatsimiititaliamit pitsaasutut nalilerneqarpoq, naak piginnaasakinnerpaat angusinnaasaat tunngavigineqarsimanngikkaluartoq.

Qulaani pineqartut tunngavigalugit inatsisissatut siunnersuummi imm. 14-ip, taamatut isikkoqartillugu akuersissutigineqassasoq ataatsimiititaliaq isumaqarpoq.

#### **4.3 Atuartut angerlarsimaffii pillugu aalajangersakkat allannngortinneqarnerat.**

Atuartut atuartut angerlarsimaffiini aamma kolligieni najugaqartarneranni piumasaqaatinik minnerpaaffiliinissaq pillugu Naalakkersuisut aalajangersaasinnaanerat siunnersuummi matumani imm. 11-kkut siunnersuutigineqarpoq. Tassani pineqarput atuartut angerlarsimaffiini aamma kolligienik taaneqartartuni minnerpaaffiliisinnaanerumt periarfissat. ataatsimiititaliap maluginiarpa perorsaanerme avatangiisitigullu sinaakkutissat pillugit misissueqqissaarnermi atuartut angerlarsimaffiini minnerpaaffiliinissaq pingaarnertut qulequtaasimasoq, tassani ikinngutigii avataanni inissisimasarneq, inigisat pitsaanngissusaat aamma meeqqanut sullissinerme Taamaattorli kommunit aamma atuartut angerlarsimaffiisa assigiinnginnerisa annertunerat inerniliunneqarpoq<sup>4</sup>. Atuartut nunaqarfinneersut nunaqarfigisaminniit illoqarfinni atuariartorlutik atuartut angerlarsimaffiinit nuukkaangata atuartut angerlarsimaffiisa qitiulluinnarnerat ataatsimiititaliap nassuerutigaa. Angajoqqaat meeqqatik aallartittarpaat aammalu meeqqaminnik nakkutilliineq ulluinnarnilu akisussaaffiup ilaa kommuninut tunniuttarlugu. Tamannali malittarisassiuunneqartariaqarpoq taamaalilluni meeqqap ulluinnaa qanoq ittuunersoq kiisalu angajoqqaat ilinniartullu pisinnaatitaaffii angajoqqaanit meeqqanillu ilisimaneqalerluni. Taamaattumik atuartut angerlarsimaffiini najugaqarnissamut minnerpaaffissaliinissaq qitiulluinnarpoq.

Siunnersuummut nassuiaatini nalinginnaasuni tamatumunnga atatillugu Naalakkersuisut ima oqaaseqarput:

*”Atuartut angerlarsimaffiini kolligienilu najugaqarnissamut minnerpaaffiliinissamut tunngatillugu taanna namminermini aningaasatigut allaffissornikkullu kingunissaqanngilaq. Tamatuma malitsigissavaa nalunaarummik suliaqarnissaq. Tamatumunnga atatillugu oqaatigineqassaaq tamanna kommunit suleqatigalugit pissammat. 2011-mi Ilinniartitaanerumt Ilisimatusarnermullu qullersaqarfiusimasup atuartut angersimaffii pillugit*

<sup>4</sup> ”Atuartut angerlarsimaffii pillugit nalunaarusiaq – nunaqarfiit atuarfiinniit illoqarfinni atuarfimmumt ikaarsaariartarneq pullugu eqqarsaatersuutit inassuteqaatillu.” Ilinniartitaanerumt Ilisimatusarnermullu Naalakkersuisoqarfik, 2012

*nalunaarusiaani takuneqarsinnaavoq piffiit imaanni illutatigut  
ajornartorsiuteqartoqarsinnaavoq kiisalu sulisut ilinniarsimasut  
amerlassusissaat ajornartorsiutaasinnaalluni.”*

Pisinnaatitsissutip aningaasatigut allaffissornikkullu kommuninut toqqaannartumik kinguneqartussaanginnera ataatsimiititaliamit isumaqatigineqarpoq. Taamaalilluni pisinnaatitsissummi atuartut angerlarsimaffiini kolligienilu minnerpaaffissaliinissamut taamaallaat Naalakkersuisut pisinnaatinneqassapput. Siunnersuummili imm. 11-mut nassuiaatini takuneqarsinnaapput minnerpaaffissaliinerusinnaasut suunerinut assersuutit, tamanna naak piumasaqaatit ilusilerneqanngikkaluartoq tamakiisumillu nalunaarsuisoqanngikkaluartoq;

*”Siunnerfiuvoq naleqqussaaneq pisinnaasoq pingaarnertut isiginninnermik tunngaveqartumik, perorsaanikkut isiginiagassat, atuartitsineq aamma avatangiisit killiliussat eqqarsaatigalugit, tassanilu atorfiit akuerisaasut, aaqqissuussaaneq aamma atuartut ineqarfiisa aamma atuartut najugaqarfiisa akornanni pissutsit aaqqissuussaannermi ilanngunneqarlutik. Piginnaatitsissut assersuutigalugu atorneqarsinnaavoq pituttuisumik piumasaqaatit minnerpaaffissaannut, atuartut ineqarfiisa aamma atuartut najugaqarfiisa sananeqartarneranni atugassarititaasunut. Piginnaatitsissullu ilutigisaanik atorneqarsinnaavoq annertussusissanik aalajangersaanernut, perorsaanikkut imarisassani, tamannalu ilaatigut pisinnaalluni assersuutigalugu atuartut nunaqarfinneersut ilikkagassatigut ineriartorneri, atuarfinnut qaffasinnerusunik naammassisarfiusartunut ingerlaqqinniarnerni tapersersorniarlugit.*

*Taamaasilluni assersuutigalugu aalajangersaasoqarsinnaavoq piginnaasatigut piumasaqaataasussanik aammalu sulinermik ingerlatseriaasissanik sulisunut tunngatillugu, atorfillu qassiunissaannik aaqqissuussinernik. Aaqqissuussinernilu aamma ilaasinnaapput nakkutilliinermut tunngasumik apeqqutit, isumassuineq, ileqqorissaarnissamut aalajangersakkat, nerisat aamma peqqinnissaq, ilinniagasserineq, peqataatitsineq atuartunik sumiiffimmi namminermi inuusuttuaqqanut sammisassaqartitsinerni aamma sunngiffimmi sammisassaqartitsinerni, suleqatigiinneq atuartunut angerlarsimaffiup aamma atuartut nammineq angerlarsimaffiata akornanni il.il.”*

Qeqqata Kommuniata tamatumunnga tusarniaanermut akissutaanut ataatsimiititaliaq isumaqataavoq, pisinnaatitsissutip oqaasertalerneqarnerata nassatarisaanik sunik naatsorsuutigisaqarnissaq kommuninut paasiuminaassinnaammat. Tamanna tunngavigalugu ataatsimiititaliamit kissaatigineqarpoq pisinnaatitsissutip imarisaanik erseqqissaasoqarnissaa. Tamatumunnga atatillugu siunissami nalunaarusiassap atuartunut angerlarsimaffiisa illutatigut

perorsaanikkullu sinaakkusiineri pillugit isummernissaa ataatsimiititaliamit kissaatigineqarpoq. Nalunaarusiassap suliarineqarnera eqqortoq kommunit suleqatigalugit Naalakkersuisut ilusilersussamaaraat ataatsimiititaliami maluginiarneqarpoq, takukkit inatsisissatut siunnersuummut nassuiaatit.

Tamanna atuutiinnartariaqarpoq, minnerunngitsumik atuartut angerlarsimaffiini illutatigut minnerpaaffissaliinissamut nalilersuineq kommunit aningaasatigut nammassinnaasai eqqarsaatigalugit piviusorsiortuusariaqarmat. Tamatumunnga aamma tunngavigineqarpoq kommunimut aningaasartuutaasussaanerata kingunerissammagu ataatsimut tapiissutit malillugit (DUT-princippet) nunatta karsianut aningaasartuutaasussaanera.

Aalajangersimasumik kommunip tunngavigisaannut eqqarsaatiginninnermi atuartut angerlarsimaffiini perorsaanikkut sinaakkutissat aamma atuupput. Perorsaanikkut sinaakkutissat aalajangersarneqalerpata, ima aalajangersarneqassanngimmata allaat kommunit sulisoqarnikkut pissutsit piviusut malillugit malinnaasinnaanatik, sulisut ilinniarsimanissaannut tunngasut eqqarsaatigineqarnissaat Naalakkersuisunut ataatsimiititaliamit sakkortuumik kaammattuutigineqarpoq.

Qulaani allassimasut tunngavigalugit, inatsisissatut siunnersuummi imm. 11, maannakkut oqaasertaliunneqarsimasut pillugit erseqqissaaserlugu akuersissutigineqassasooq ataatsimiititaliaq isumaqarpoq.

Atuartut angerlarsimaffiini aamma kolligieni minnerpaaffissaliinissamut malittarisassat aalajangersarneqarnissaanut inatsisartunit Naalakkersuisunut pisinnaatitsissutip imarisaanut ataatsimiititaliap allannguutissatut siunnersuutaata kommunit pitsaanerumik piareersarsinnaagai ataatsimiititaliamit isumaqarfigineqarpoq. Tamatuma saniatigut pisinnaatitsinerup aningaasatigut allaffissornikkullu kingussarisassaanut, timitaliineq Naalakkersuisunit kommuninik qanimut oqaloqatiginninnikkut aalajangersarneqartoq apeqqutaalluinnassasooq ataatsimiititaliap paasisinnaalluinnarpaa.

## **5. Siunnersuummut aningaasatigut kingunissaritinneqartut**

Siunnersuutip piviusunngortinneqarnerani aningaasatigut kingunissaritinneqartut siunnersuummut oqaaseqaatini nalinginnaasuni allassimapput. Tassani atuarneqarsinnaavoq malittarisassanut atuuttunut nalimmassaasooqarlunilu naleqqusaaneriinnaasooq.

Siunnersuut una imikkut aningaasatigut kinguneqartitsisoqassanngitsoq siunnersuummut nassuaatini nalinginnaasuni ilaatigut allassimavoq. Siunnersuummut tunngatillugu tamanna eqqortuusorineqartariaqarpoq. Imm. 11-mut tunngatillugu nalinginnaasunik oqaaseqaatini atuartut angerlarsimaffii pillugit nalunaarusiaq 2011/2012 Naalakkersuisut innersuussutigaat. Illutatigut sinaakkutissanut tunngatillugu minnerpaaffissatut piumasaqaataasinnaasunik nalilersuinermut tunngasut ilaatigut nalunaarusiami ilanngunneqarsimapput. § 37. naapertorlugu apeqqut 2017-136-mut Naalakkersuisut akissuteqaataat naapertorlugu, 2011-



mi nalilersuinermi saqqummiunneqareersut illuutit pisoqalisimanerat, iluusaarnerit il.il. pereersut nalilersuinerup saqqummiunneqarneranit allanngoqqissimanissaat ataatsimiititaliap paasisinnaavaa. Taamaammat ataatsimiititaliaq isumaqarpoq Naalakkersuisut – inatsisissatut siunnersuut una pillugu inatsisartut aalajangiinissaminut toqqammavissat kommunillu isummernissaat eqqarsaatigalugit – siunissami atuartut angerlarsimaffiini minnerpaaffissaliineq pillugu nalunaarutissap aningaasaqarnikkut kingunissai pillugit aallarniutaasumik nalilersuisimasariaqaraluartut, tamanna soorunami Nalunaarutip suliarineqarnissaa pillugu siunissami kommuninik oqaloqateqarnissaq ataqqillugu.

Ataatsimiititaliaq tunngavilersuutit aallaavigalugit siunnersuutip imarisaasa sinneri pillugit allatut nalilersuinissaminut tunngavissaqarsorinngilaq, tassa, faginik allannguinermut aamma klassinik alluisinnaanermut uteqqiisinnaanermullu periarfissaq pillugu. Naalakkersuisut tamanna misissoqqissaarsimassagaat ataatsimiititaliamit tatigineqarpoq siunnersuutillu imarisaasa sinneri aningaasaqarnikkut kinguneqartitsissanngitsut. Naatsorsuutigineqartup parlattuanik pisortat aningaasaateqarfianut aningaasartuutissanik allanik nassaartoqassagaluarpat, taakku aningaasaliissutaareersunik matussuseqartariaqassapput. Tamatumalu kingunerissavaa iliutsinik allanik tunulliusisariaqarneq.

Ataatsimiititaliap allannguutissatut siunnersuutaannut tunngatillugu, isumaliutissiissummi imm. 4.3 innersuussutigineqarpoq.

## **6. Ataatsimiititaliamit inassuteqaat**

Ataatsimiititaliaq **isumaqatigiittoq allannguutissatut siunnersuuteqarpoq.**

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Mimi Karlsen  
Siulittaasoq

---

Vivian Motzfeldt  
Siulittaasup tullia

---

Laura Táunâjik

---

Peter Olsen

---

Anthon Frederiksen